



Willi Berther-Lüthwiller, Adliswil / Camischolas 1928-2002

Ils 8 da fenadur ei la veta terrestre da Willi Berther ida alla fin. Alla fin ei era la nauscha malsogna ida che ha turmentau el il davos temps da sia veta.

Sco secund fegl da Gion Battesta Berther e Genoveva Berther-Peder ei el naschius ils 3 da zercladur 1928 a Camischolas. Suenter el ein aunc 6 fargliuns vegni tier. Da gliez temps ina famiglia purila sco prest tuttas en la Val. In tschappel affons, pign menaschi puril e lavur di e notg. Cun segidar gia baul cun bab e mum-

ma, frequentar las usitadas scolas dalla Val, pigns gudogns accessoris sco fumegl ni ira ad alp ei era la veta d'affonza e giuventetgna sesplegada per Willi. Duront il temps che l'uiara furiava en l'Europa e nos babs vegnevan clamai da mintga temps sut las armas eis el vegnius ord scola. Lavur er'e scart e far gronds plans savevan ei buca. El ha fatg la valischa ed ius per dus onns a Winterthur tier in pasterner. Purtar ora la rauba da quel e schiglioc segidar el menaschi dil patrun.

Pils cuolms e per la patria ha el adina giu carezia ed il schar encrescher era in sentiment enconuschent era per el. Aschia eis el returnaus a Sedrun. Tier Lucas Cavegn dalla posta sa el luvrar sco pot. Suenter la scola da recrut, fa el corporal e premsergent. Entras sia lavur a Sedrun eis el sedecidius da far igl emprendissadi tier la posta e serenda per quei intent 1949 ad Adliswil. Da 1950 tochen els onns 60 viaden lavur'el d'in liug a l'auter denter Turitg ed Adliswil. El era vidlunder da ponderar in retuorn en sia patria. Ilos cuolms giavinavan tondanavon. Siu patrun ad Adliswil ha tuttina saviu perschuerder el da surprender in post definitiv ad Adliswil. El ei sedecidius per quei pass e seigi mai s'enriclaus.

1959 marida el Ruth Lüthwiller ed els han giu in fegl ed ina feglia. A Sedrun conquistan els pli tard ina atgna habitaziun da vacanzas e sias visetas, sias turas, siu sport e hobi els cuolms ha el saviu frequentar vinavon.

1993 ei il temps da pensiun staus contonschius. En la gasetta «Der Sihltaler» ei cumpariu sin quei in artechel sco engraziamenti per sia prestazion e per la fetg buna tgira da sia clientella.

Oz ruaussa el ad Adliswil el santeri. Possi el ver anflau siu ruaus e nus sperein sin il seveser – ruaussa en pasch!

Tiu frar Nazi B.